

四庫全書

集部

欽定四庫全書

集部

弇州續稿卷二十一

詳校官編修

臣潘庭筠

中書

臣

劉源溥覆勘

總校官進士

臣楊懋珩

校對官庶吉

臣何思鈞

謄錄監生

臣張元信

欽定四庫全書

弇州續稿卷二十一

明 王世貞 撰

詩部

五言絕句

為胡元瑞題綠蘿館二十詠

石屏

一夜點蒼山入君讀書舍
羊眠白雲色而親在其下

琴

誰言廣陵散便逐嵇生逝小作三日思歸鴻渺然至

劍

葉葉雙芙蓉半蝕土花碧乍可千歲埋不借一夫力

書笥

一字少有餘五車多不足七日暴君笥何如晒君腹

玉磬

濯濯泗濱玉泠泠時一拊門有荷蕢言汝心在千古

五嶽圖

自謁上元歸不作向平想儼然病維摩阿閼在手掌

碁

欲知九枰勝來自孤山媼但賭宣城郡不賭謝公墅

膽餅

小小一軍持時露春消息擲去色即空插來空即色

笛

截彼君山竹譜作瀟湘思他年遇阿猷不得誇身貴

茶竈

蟹眼猶未發雀舌已芬敷自炊還自啜不愛文君鑪

螺杯

君房鸚鵡杯堪汝醉千日那似壺公壺易入還易出

琴石

飈爾金飈過嚶然冰絃響彷彿百尺桐仍栽嶧山上

博山鑪

匡牀金博山上有鸛鵒斑輕飈約香霧裊裊上雲鬟

麈尾

愛君兩手色白於手中玉第深無諍義麈尾何必禿

羽扇

不愁秋氣至棄置歸篋中當時萬里翮扶搖快秋風

芒屨

笑他阮宣子生平但蠟屐何似芒屨輕春原踏無跡

芙蓉帳

挑燈捲綃幕朶朶秋花明恍如挈仙侶踏月芙蓉城

湘竹簾

玉臂展清輝，輕紋熨柔翠。不道香汗流，道是湘君淚。

胡牀

胡郎坐胡牀，却發庾公興。冉冉南樓月，徐徐破殘暝。

石枕

枕此支機石，欲挹天漿冷。無奈泥丸翁，時時喚令醒。

十一月弇園紅梅盛開偶成

仲冬墮梅發，繁英簇紅霞。過意百花魁，翻疑百花殿。

其二

大小兩黃鸝公然喫花住頃刻布同雲迷却來時路

貽拱辰兄詩之來歲為辛巳秋有傳舉丈夫子者

再得四絕句

念無凌風翩啖汝洗兒果莫笑儂無功一字珠一顆

其二

去家不百里幽蘭生鄭谷即看入夢後榮庭盡芳王

其三

抱兒謁先公了此宗祧寄羸得七尺軀別創千秋事

其四

人言此石丈磊塊無潤色我見重再拜中孕連城璧

贈松隱上人

為愛松隱名去覓松隱跡只在此松間覲面不相識

其二

偶步九里松忽聞清唄響不見諷經人聲逗青松上

贈張五鹿三絕句

其門人為請

屠生似北海睥睨一世士自過康成門手標通德里

屠令

製扁標其門曰賢者

其二

授經何循循標行乃嶽嶽雖踐五鹿稱疇忍折其角

其三

若個是何湯老作受經生一當天子問推轂桓春卿

和肖甫司馬題暘德大參東園五言絕句十首

最景園

歸仗日月餘細割湖山勝未論帝釋園人間許誰竝

團雲徑

白雲滄作團回風吹不散截置一鉢中與作山僧飯

蒼雪塢

團雲變晴色古木鬱蒼蒼未酬郢里倡且奏梁園觴

叢蘭館

幽館尋欲迷賴爾同心引任是當門生欲鋤還不認

挹華軒

水木旦夕華茲軒巧相挹為憐眉宇清不惜琴樽濕
真然堂

披襟納雄風咽如吸清冷主人不喜醉醉亦易為醒

專旭樓

當頭一鏡懸出沒兩輪疾為借山色來不作尋常日

殮英館

人見黃菊開幾見黃菊落欲得詩脾清摘英和露嚼

右軍池

水是右軍池人是右軍裔白麻昨夜乾黃庭榻來未

通華徑

峭蒨青蔥間所得亦已足忽轉天地開錦繡匡山谷

題春雷出蟄圖

一夜春雷發羣蟄自相語神龍豈不勞人間要霖雨

枝上小雀

尺鴟棲一枝粒粟俄已飽却笑垂天鵬饑飛何時了

夢根蟹

嗟喋紅蓼根雙螯利於手橫行能幾何終當墮人口

余自庚辰來抱影曇靖不識城西水面者三載餘
矣癸未八月乃送張肖甫大司馬九月送汪伯
玉少司馬十二月送陸與繩少宰甲申三月送
吳明卿大參八月送李本寧大參貞吉與焉九
月送歐楨伯虞部遠或泊清洋近亦關外而明
卿獨相蟬援遂抵崑之王龍橋泊焉見者當駭
傳以為且破木义而不知是六君子皆生平故

人張范之好而命千里嵇呂之駕恨不能汎一
葉舟裹百日糧相從於五湖之溪何論木义也
今吾已徙處深林而所謂故人者亦且盡矣間
居無事愴歎之餘人成一絕以紀其事

送肖甫司馬於清洋江口

其奈清洋口噓為南北風已無官可免那不送羊公

再送伯玉至清洋口

三年洗情字一夕為君新欲忍臨岐淚人間無此人

三送與繩至喬子

人笑嵇生嬾胡然送巨源歸鴻君自看依舊入蘓門

四送明卿夜宿玉龍橋

為少柴桑客都令慧遠驕那知今夜月已過虎溪橋

五送本寧觀潮南浦

簫鼓下江門江潮弄午喧怕題南浦字楚客易消魂

六送楨仲於城西關

請得歲隄鑰踟躕未忍還亦知譙鼓急片語萬重山

用前例送家弟敬美視閩中學然至北水關而止
蓋余已徙居鄉故也

祖席何妨遠依然北水門信知情至處一步也消魂
即事

出語膾一世不受兒輩悅總為般若河雅無文士筏
其二

聖如薄伽梵狂如阿闍世順逆雖有殊從兒得初地
僧明智自吳明卿所來將謁海東補陀大士贈之

得二首

汝從下雉來欲作補陀參風波了無際惟有天蔚藍

其二

不知圓通老道場在汝耳一夜海潮音我聞亦是

約圃雜詠

媚清軒

綠篠媚清漣清漣媚綠篠水竹兩相媚於中寄吾傲

玉鱗館

天矯五蒼龍一夜化為玉欲乘向瑤池嬾不代吾足

烟鬟亭

暝色團一丘炊烟四無際如入法華境面面青螺髻

欣托廬

竹為衆鳥欣廬亦吾所愛不作物我觀彼此兩無礙

適我軒

於我既已適於彼寧參差惟當慕落際我適彼不知

送元馭閣老二十里橋同前例得一絕句

欲作男兒別將情強折磨更堪天上淚翻比世間多

弇園雜詠四十三首

清涼界

步屨修竹林銀橋佛廬淨灑然忽清涼是境還非境

惹香迳

花氣無不薰偏與紅妝媿夜分乍解衣宛是收香鳥

此君軒

不可無此君種得百千箇試與較風流此君可無我

會心處

下有在藻魚上有啁花雀歷歷如鏡中時時與心約

玉蘭臺

謝庭凡幾樹羯末與封胡何似瑯琊邸亭亭玉十株

誤游磴

縱呼誤游磴勝事無不真惟嫌入山客喚作出山人

香雪徑

李白媚楊白浪誇春雪香除却江家女誰花可得當

飽山亭

客但憇此亭飽看山色足若更入山深寧知真面目

萃勝橋

鏡收遠近觀轂綰往來路至此即命觴徘徊不忍度

簪雲峰

峰勢若簪雲雲根何太低記得丈登路如綿襯馬蹄

突星瀨

五夜鐘欲殘羣星墮如雨化為瀨中石欲飛不得去

小龍湫

澄澄一泓水那得吐光怪山人七寸鉢尚有神龍在

千年菌

商山千年菌一朝化為石莫令鮑靚過截作中時食

白雲障

茅山陶隱居自愛山雲白莫言難贈君于今已成石

黑雲堆

輪囷一片峯宛如黑雲吐猶疑膚寸合解作人間雨

潛虬洞

陰森石欲搏曲躍津難渡欲留不敢留一去一回顧

青虹梁

青虹下飲水徘徊不能去為我作石梁遂得天台路

雌霓梁

青虬在其上雌霓甘為下游者雖異途陰晴不相舍

契此巖

契此不彌勒此像非契此許大須彌山收置一囊裏

忘魚磯

我非漢莊光釣磯滿蒼蘚雖有種魚經生來不開卷

環玉亭

春寒不成出小出坐此屋不知天工巧樹樹雕成玉

憫湘石

宛宛欲沈波憔悴抑其首可憐望夫心却作秋胡婦

率然洞

一夜中奔雷率然穿作峽蜿蜒詰曲中時時露鱗甲

天骨峰

天公幻天骨自然吐奇秀寧如宋人葉三年雕始就

小雲門

窈窕如不窮芊眠足餘趣豈必有雲歸自是歸雲處

漱珠澗

止水清可掬居然媚其澗吾有萬斛珠漱令夜光現

借芬閣

隔崦千葉桃清芬襲人鼻更許牆頭醪不妨便成醉

含雪閣

直對縹緲樓疊玉映晶潔誦得少陵詩憲含西嶺雪

梵音閣

夜半海潮音松風竅天籟我亦從中證非惟觀自在

榮芝所

三弇此三夏三產三秀草吾亦有三兒寧馨似芝好

徙倚亭

壺公樓不開於此待呼鑰長房少須臾終享塵外樂

分勝亭

亭前有兩徑俱取弇山右處處饒勝奇誰能雙舉肘

百衲峯

大似百衲僧却顧僧離語其語了不聞低頭似相許

雲根嶂

偶然白雲至輝輝兩相向下有暗泉流呼作雲根嶂

玢碧梁

西弇石漸頑此梁獨玢碧近取脩竹蔭遠借高天色

却女津

少女怯危津徘徊不敢度
急喚阿麼來還尋舊時路

惜別門

醉客插花歸一步一惜別
不盡眼底奇歸從細君說

碧蓮池

世尊蓮正青遠公蓮自白
爾向青白間別作天水碧

文漪堂

清漪感蘋末悠然自成文
得月稍綺麗含霞太繽紛

步屨廊

百步響屨廊步步有山看臨當出門去猶復凭闌干

來玉閣

浙浙萬瓦敲沈沈一壺醉窻裏玉山頽窻外玉山至

襴雲窩

甲帳挂流蘓人道春雲熱梅花一紙寒襴雲雲不泄

墨池

書不如右軍何煩使池墨唯用將洗心能令淨業白

題杏花書屋圖

十里杏花幄書聲琅然出要踏曲江春還從此中覓

題山水

隔崦青峭峰撲作眉間色其奈春水深褰裳不可得

贈譚道人

為余三月住寄食贊公房却問香積飯何如大乙糧

其二

昂藏九秋鶴悅懌三春柳宛似譚景昇化書可成否

其三

聞汝返金山何不焦山住焦光雖苦生郭第能供具

其四

汝携王孫詩為標國香集將過沅澧間秋蘭見應泣

題奕碁圖

松下兩仙人碁聲日敲擊不愁清景移愁它殺機發

文殊洞

老大妙德軀于焉暫棲止猶勝運平時棹入粥鍋底

辟支塔

自參薄伽梵悔作辟支佛舍利何足言劫前一枯骨

又題清涼臺

別借金剛窟微分室利場羞他石衛尉火宅號清涼

金谷有清涼臺

公瑕先生在白下兩月許別去得四絕句送之皆實際語也

長干一萬家半是君題壁欲贈草書歌慚余非李白

其二

同是金陵客君歸我不歸江頭一延頸悔殺是朝衣

其三

爾賣梅花庄我冷芙蓉墅樂處不得歸歸即無樂處

其四

念汝西河戚身罹隔谷悲人生缺陷地同是白頭時

追補姚元白市隱園十八詠

玉林

天墜白玉簪竄作君家林忽爾天籟發珊瑚環珮音

茶泉

先從陸羽品旋向君謨關蟹眼初潑時靈犀已潛透

中林堂

長林四周遭於中可避世何必學黃公商山尋地肺

思玄堂

棲君思玄室誦君思玄賦此意無可言莫為平子誤

春雨畦

一夜春雨過千畦盡成綠不曉意所欣道是齋厨足

觀生處

但欲觀我生茫茫無可據
斷盡有漏緣悠然見生處

容與臺

一琴復一觴咫尺容與不作繁
吹臺歌管日聒汝

海月樓

明月將海色闌入君家樓憑欄
一矯首滿地金波流

鷺羣閣

周郎卧水閣日從墨卿御不敢
寫黃庭為恐籠鷺去

鷗波

數點白不定忽浮還忽沈非關乏去志緣爾少機心

洗硯磯

右軍洗硯池池水猶未黑借問何以然為有魚吞墨

柳浪堤

垂楊釀新柳蕩漾如春波欲學三眠穩其如波響何

秋影亭

秋樹影扶蘇斜陽半亭挂似延李營丘寫得寒林畫

浮玉橋

水面蜿蜒虹乃是堅牢玉我欲訪蓬萊鼇鼉不須屬

芙蓉館

水木兩芙蓉為媚非一時客愛承露色我愛凌雲姿

鶴徑

藩竹別成徑小欲觀步鶴何似養翮成高秋縱天路

萃止居

客從何方來來復不肯去為貪主人佳盡作王猷趣

借暝菴

暝色何可愛為辭白日囂非同倦飛鳥大小歸其巢
傷俞四盲子伯安為其父仲蔚絕後也

汝生不成生汝死乃真死可憐桑苧翁今作若敖鬼

其二

莫以盲兒醜亡來亦可傷徵君三尺土隨意上牛羊

題沈啟南畫忘憂草

嫣然一株花媚此庭中幽翻覺此名贅人生何所憂

沈啟南畫溪亭散木圖入元人題此不覺塵思灑

然

古木蔽炎日新蕉延遠颶大有會心處悠然當告誰

題張復畫二十絕

山坳滄白雲天外挂紅日於中得少趣翻嫌去帆疾

其二

借彼容足地寓此無窮目別岫寫遠青微波皺新綠

其三

樹樹鴨頭綠溪溪魚鱗白欲覓酒家胡雲深斷行跡

其四

千巖去不盡一瀑斷還連
踟躕不忍別且伴鹿麕眠

其五

斜頭長松下垂釣清波裏
借問漁者誰不語亦不起

其六

中天挿怪石半壁界飛湍
欲識溪橋路前林楓葉丹

其七

白雲封不住碧樹吐奇滋
相看兩無語各是會心時

其八

疎林帶遠色危石激清籟時有遠鐘聲窅堵在雲外

其九

參差佛頭山迤邐鮫人室但許日高眠何妨氣蕭瑟

其十

犯漢峯巉巉濺流石齒齒中有一漁舟疑是玄真子

其十一

高梧翳長空驕陽安在哉綠蕉携石色復自牆頭來

其十二

孤亭卓危岫下臨千仞溪不識琴中理蕭條空自悲

其十三

怪石露山骨喬松吸雲根于焉聊一憩可以清心魂

其十四

著蘚石逾醜欺霜樹成頽寫此無聲詩摩娑亦不俗

其十五

列岫引船頭千林簾牆角著著此中佳此中人不覺

其十六

一帶孱顏嶺蒼黃庵靄間浮雲忽中斷界出米家山

其十七

高巖如被簑紛紛挂藤薜下有青葱樹直上闢秋色

其十八

不受奚官秣嘶鳴恨自深念君非伯樂安知千里心

其十九

蹇衛不肯前千山盡成縞唯餘數株栢不與山同老

其二十

挿天兩喬松下有兩翁語異日坐松根還能具鷄黍

又題庚寅元日

今歲庚寅旦真成白虎蹲君王且莫發烏鵲正爭喧

余佐留樞諸曹掾中有南充劉璋者偶諸生試其
文爛然已而竟從本格得官將歸省叩余秋署
乞一言之贈若有不釋然者余閱其意走筆得
二絕句付之時方乞休在告也

念汝得一官壯心猶若失却問漢功曹何煩曉經術

其二

汝返巴中路千山盡子規金陵啼不徹況乃日斜時

為緣督比丘題戚不磷畫

山深斷人跡雲滃迷前路偶爾飛錫鳴知是僧歸處

題畫石榴

君自閩天來豈少陳家紫何似安石榴累累結佳子

談思重為吳翁晉畫枯木白頭翁因題一絕

可憐白頭翁振羽一枯木莫訴春風饑早晚櫻桃熟
謝病閒行至攝山而司馬故部劉將軍馳送出一
扇乞詩走筆得五言絕與之

呵殿都揮盡肩輿松栢風猶殘故部曲一騎夕陽中
題倪元鎮小畫

懶瓚真懶瓚殘楮復殘墨不結丹青緣物外寫秋色
為于生題周叔夜畫扇

初見謂倪迂稍看乃周瘦留作千古心毋輕寘懷袖

六言絕句

夢後戲成

習風消除未盡夢裏青衫一官二十六年金紫此夢已
覺猶殘

其二

一生奔走紅塵有夢暫作閒人今日身閒夢甌不知誰
假誰真

為韓臣題書齋

月團小鬪茶品雲液全依酒經博山裊罷沈水白麻搗
得黃庭

漫興四首

西風吹葉攪眠家家拆洗裝綿唯有老夫不會一壺且
暖目前

其二

負曝小坐冬烘兀兀騰騰夢中耳邊忽報飯熟一笑拋
却周公

其三

殘鐘四點五點新月一櫺半櫺却笑當年此際酒去愁
來到明

其四

無名野花爭發自在清溪暗流聽罷農歌擺耜旋聞山
鳥鉤輶

口號十首

儒童本來菩薩大覺亦是金仙其奈兒孫合開與說無

始根緣

其二

維摩夜來病熱千言萬言不休偶然刹那閉口坐斷天

下舌頭

其三

有子莫習抱朴無師難解參同覓得生前一物萬古明

月清風

其四

玄奘欲從西返道遇達摩東歸我已盡熱義相百夾千
像何為

其五

香積鉢底分飯趙州鑪頭啗茶喫了依然不會問著只
索瞞他

其六

趙州行腳亦得寒山散聖也奇五葉莫嫌零落五位已
自支離

其七

講座清涼疏鈔禪宗臨濟評唱不論伎倆有無見了先
喫十棒

其八

銅龍自鎖幽闕白虎不借西隣齋庫爛錢一索遣發上
陽道人

其九

夢後喚醒良知靜中養出端倪舉似瞿曇雲李老曾止啼

哭小兒

其十

易擲千金大海難拋萬卷填胸未敢望他乾慧且求暫
落頑空

題小溪港

愚公剪分燕尾封姨熨皺教文省可全貯初月有時半
罨春雲

得屠長卿慰辰玉悼亡六言六絕句和示辰玉

大點不作奉倩小戀聊似安仁一枕槐根夢覺依舊人
間散人

其二

洛陽千樹花落爭怨東風作惡記取花未開時眼底何
曾寂寞

其三

莫倚青天長在

長卿句
云云

四禪始免風輪不生自然不滅

無患須解無身

其四

勿學君家夷甫駕言我輩鍾情掃却世間情事脚底蓮花自生

其五

與覩帝釋天女始得難陀興闌至今揚湯止沸寧如火盡湯寒

其六

牢記阿翁數語展然一笑撒開何事悲他冥路比汝先

見如來

有感

人云舉頭八座我曉失足三途開籠故憐鸚鵡倚杖或
聽鷓鴣

其二

漸疎青州從事頗倦子墨客卿心事栽松道者門風泄
柳先生

其三

孟嘉司馬方外弘景宰相山中何似破除都盡止管山
月松風

其四

出逢野人爭席歸覩山鳥銜花無妨淨行居士是否禪
那作家

弇園雜題八絕

西歸津

佛日瞻依咫尺其奈波羅乏船藉令折蘆北渡何似隻

履西還

磬王峽

尋源渺渺無際擊石泠泠異音病夫世念灰盡未許荷

蕢知心

紫陽壁

紫陽一壁乍開千疊磊砢崔魏不是祖龍鞭就却疑靈

鷲飛來

鼇背梁

小立中舁鼇背俯看霹靂巔
東澗藤緣西澗下盤花
接上盤

碧皺峯

一峯面孔螭食丈以碧皺嘉名從此盧家老婢醉倒七
碗先生

九龍嶺

嶺頭頂立青松往往人呼九龍但作華陽好友不忘秦
世崇封

廣心池

莫欺方池一碗對爾胸中廓然平吞雲夢八九別有世界三千

芙蓉渚

薰風廣池佳麗白露一岸清華喚作玉兒俱得元家難比蕭家

送楊寧叔歸山東

楊烈寧叔者東萊之昌邑人也二十一以諸生

高等應試歸失母葬畢徒步二千里謁余請受
詩於錢生研精制科業兼通古文奇書其純孝
高志苦節獨行未易以更僕數今年學成別余
而歸省墓因就試山東予之郵繻辭貽之資斧
亦辭曰非吾徒步意也記東萊有毛文簡公者
去生踰百年矣相業高一時得大臣進退之
義其領解之齡即生歲也因贈之六言二絕句
且以文簡公為屬云

不辭鄭玄負笈欲從匡鼎解頤今日阿蒙吳下他年夫子闕西

其二

百年汝鄉人傑一代山斗毛公母論鰲峯冠頂要並麟

閣標雄

弇州續稿卷二十一

欽定四庫全書

集部

弇州續稿卷二十二

詳校官編修_臣潘庭筠

中書_臣劉源溥覆勘

總校官進士_臣楊懋珩

校對官庶吉士_臣何思鈞

謄錄監生_臣張元信

欽定四庫全書

弇州續稿卷二十二

明 王世貞 撰

詩部

七言絕句

題宮人調鸚圖

唐人詩云含情欲說宮中事鸚鵡前頭不敢言
誤也政當托此禽達之

杏花枝上綠衣娘與訴宮中事不妨只恐匆匆記未盡

且教三字憶君王

詞有憶君王

抵滁陽聞拱辰石太僕將至留贈

雙旌宛轉下滁州真氣如聞在後頭聖代豪賢多九列
何人數馬似恬侯

其二

瑯琊山色四時妍最喜清流號釀泉前輩風流今又見
使君剛及醉翁年

次嚴太保詩後送尤介夫入都

山人不愛青山住，乞得山中宰相詩。
若遇郝家公子問，住山須待買山貲。

贈憲美弟移居

嶽王市傍三畝宮，曲曲清溪襯極風。
但使兒童如錦里，不須名姓學牆東。

徐長孺及郁子以制科業見訪有答

宛轉雙龍血未乾，閒逢老馬步闌殘。
莫誇王勒金羈事，

見說人間行路難

其二

休將深淺問蛾眉
欲答蛾眉淚已垂
花樣三千宮女面
何人不妬奉恩時

梅花下得劉伯真廷尉書却寄

萬里清江萬里魚
即看魚尾定何如
江南二月梅花後
剖得夷陵八月書

其二

小苑紅梅刺眼新一枝分作峽江春長安驛騎知何限
天上於今少故人

清明日偶爾有感

宛宛東風颺酒旗輕寒輕暖禁烟時千條楊柳長垂地
不曉人間有別離

其二

典衣沽酒莫辭貧野鳥山花無限情三尺一堆猶自濕
去年人是上墳人

雨後山園

潺湲一雨到天明
西圃小溪春漲平
任使桃花禁不得
也能波面皺紅生

徐客部元春奉使還朝四絕句

錦里春深節暫停
東風吹送上江舲
不知漢省郎官宿
分得荀家第幾星

其二

還從建禮別分臺
知爾應多專對才
屬國倘逢西極馬

可應仍為太師來

其三

鳳毛池上獨翩翩知是虞廷老鳳傳
任使罷巢阿閣後還鳴聖瑞一千年

其四

青袍柳色競爭春夾路珠簾看眼新
共道德門無限好徐郎天上石麒麟

為人贈京口何醫一絕句

君家肯讓漢淳于能使人間癘疾蘓不知京口觀濤日
曾見黃龍浴水無

贈八十翁何中翰遷故世廟侍臣也

煉來僊骨五銖輕鶴背何年上太清知是玉皇香案吏
可能還記步虛聲

其二

武帝胡髯已上天肯留方朔世間年仙宮似起偷桃獄
且向蓮花峯際眠

在明遺我湘竹榻走筆言謝

百疊香雲綴露斑夢迴身似在湘山從今去後非無客
且掛高齋一壁間

答王叔承

世所稱布袋和尚者即彌勒也在前劫為求名
菩薩當來人壽八萬歲時成佛釋迦佛所懸記
也釋迦以末劫救世故難難故多慈悲彌勒以
起劫度人故易易故多饒樂今不探其實而加以

調語得無泥犁之慮乎

不為拈花也破顏史多天上儘寬閒
隱囊一撮無勞問
中有須彌七寶山

題文待詔玄墓四景

虎山橋畔月如銀
桃花梅花相代新
不須指點增惆悵

身是當年畫裏人

予舊遊處也

其二

郁口墳前路欲迷
桃花驕殺武陵溪
樓頭一種看山眼

不見花殘襯馬蹄

其三

孤峯遠插白雲間
秀竹長松相對閒
聽得菱歌人欲近
不知猶隔法華山

其四

古塔垂傾老樹奇
霧殘雲洩轉多姿
而今始悟寒林色
大是丹青未竟時

右幅乃待詔未完筆故
為拈破勿令添足也

和韻題扇頭梅花

銅坑萬樹玉橫斜月洗烟籠領歲華
棹過酒船無好句至今猶自負梅花

徐孟章索詩為贈走筆得三絕句

奚囊恰可詩千首拄杖時須酒一壺
醉後能輕田太尉歸時那怕李金吾

其二

從令處士題鸚鵡

生有鸚鵡鵡詩

所少文君典鸛鵒

生近有悼亡之感

指口大堪容捲白轉喉何必寘雌黃

其三

自言身世兩難容，削髮從歸南北宗。

生自言欲削髮入空門

不見

高僧名慧地，還緣舊業有雕龍。

徐生號雲樵，而以葉子雪樵書為介。走筆戲成一

絕句

從誇范蠡未生魚，其奈勞薪桂不如。咲殺山人山計拙，
雲樵將至雪樵書。

顧母張孺人六十

文康公之側室也

曾參補袞扶紅日尚憶移衾賦小星四十年来丞相栢
一枝留向北堂青

送張子新之蘭谿

棹過錢塘莫厭遲千峯倒翠插漣漪居人已曉彈琴事

茂宰能歌解愠辭

君善歌
故云

其二

桐君南部盡僊官叱石為羊也不難鳬鳥一雙須好在

金華舊省是長安

給事舊省
曰金華

陸無從茂才自揚州來乞文以贈歎人吳惟登得
三絕句與之生高於詩與歐博士楨伯為廣陵

社

金徽玉軫拂塵開流水高山信指裁忽訝新聲移入散
坐中人自廣陵來

其二

維揚詞客盡英髦得句爭誇白雪高一自社中枚叟去

何人八月賦觀濤

謂歐
老也

其三

乞將新序向新安一字躊躇下筆難見說龍門饒史筆
教人解作小巫看

鄭襄徐中丞以春秋臆見貽有謝

軍城秋日靜堪貪幕府無人筆自談見說麟經新傳就
千秋不數杜征南

胡元瑞讀鄙集有寄走筆四韻答之

殺青初竟未堪論博得驪珠字字勻莫信古來才一石

與君俱是斗量人

其二

文園多病日偏長
贏得高齋看屋梁
便是王充新論就
可能相益蔡中郎

其三

處處松陰護藥壇
何人真曉大還丹
知君自有靈僊骨
叱石為羊也不難

其四

蘭陰一水下蘭溪水
隱花香水滿隄任使東流海門去
清心還向浙江西

走筆壽表兄盛氏

竹林雖好未堪求
嵇阮那能到白頭
七十古稀君自愛
何曾一醉不風流

其二

遇酒須傾醉即眠
自稱臣是酒中僊
僊家未必能勝此
不起貪嗔七十年

送陸楚生入陽羨采茶

由來陸羽是茶神
著得茶經字字真
莫道青山無宿業
耳孫仍作採山人

其二

陽羨春芽玉萬株
新焙得似虎丘無
縱令王肅無情思
不與諸僮喚酪奴

懷王大參陽德有寄

鐘樓面面是橫塘
每見雙旌度夕陽
錯喚小桃垂柳字

那曾一樹不甘棠

其二

弇山春事日爭新
轍跡從多不畏貧
所恨子猷看竹後
幾曾真遇賞心人

其三

嘗從別墅記新圖
今日陽湖即鑑湖
自是君王多物色
可能長作客星無

其四

雁蕩奇峰天下聞永嘉真柑味絕羣
啖君霜後三千顆
削脯為龍穿白雲

仲山先生歸佳城得輓歌四絕送之

縱橫馬鬣徧空山上冢諸生暮未還
玉樹祇今埋地下
銀鈎猶自在人間

其二

少日五長王散騎晚年三絕鄭台州
生來不作紅塵夢
到了青山伴白頭

其三

寶界山頭玉萬枝人忘物在轉成悲相逢莫歎風流盡
留得王維畫裏詩

其四

春風一蜨自悠揚八十能過百歲長莫怪藍田饒晚價
有兒誰似北中郎

題黃定父瓜洲小閣

小閣方牀睡思濃金山忽送五更鐘披衣起坐渾無事

喚起江南千萬峯

題畫

瘦石枯松寫暮秋清溪一道帶雲流綸竿縱有無心得
莫怪游魚不上鉤

朱翁年七十號味耕而又好菊有子為諸生故壽
之

南宮徽號下恩綸共喜高年賜帛新更是一科堪應詔
曾為孝弟力田人

其二

蕭蕭華髮倚斜楊也種黃花也種秧不是陶家五男拙
有兒身在泮宮牆

戲題詩扇後貽徐生

戢山姥姥亦可憐遇我塗鴉不值錢篋笥恩情翻不薄
好留懷袖向明年

長夏無事避暑山園景事所會即成微吟得二十
絕句

小徑平橋路欲分萬條青玉一溪雲不須更到幽奇處
便合長康寫此君

其二

剝啄從多且未磨小窗過雨篆烟凝偶然文債支梧了
却是逍遙退院僧

其三

潺湲信宿稻苗齊澗水爭趨晷畫溪處處竹梧添染碧
祇驚簾外數峯低

其四

絲竹由來非我心
未論山水有清音
空林宴坐幽深處
難道無弦不是琴

其五

日長隨意選漁竿
小港輕舸喚不難
千疊芙蓉攢碧玉
此圖留待月中看

其六

微涼浙浙上輕裾
課竹調琴一小僮
應是中丞霜意薄

故人鷄黍日從容

其七

流水高峯盡日間柴門風捲不成關
主翁雖有無勞問
原與遊人共此山

其八

爾雅樓頭日正長酒鎗茶盃博山香
歌中九友容相逐

那有閒情和栢梁

余在鄖嘗有
懷九友齋歌

其九

收雨青天挂紫虹
科頭晏坐小亭中
閒談未了農家事
一陣前溪擺種風

其十

北風高枕便羲皇
佳景無多畏景長
爭似儂家祇樹苑
六時何處不清涼

其十一

花好那能一月紅
綠肥還到九秋空
何如淺淡峯頭色
長自悠然在眼中

其十二

撥刺銀鱗跳綠波
呦呦文鹿過林阿
從教饒客頻相勸
不解祇園施網羅

其十三

寶閣蓮花法像新
垂楊拂水四無塵
那知咫尺清泠外
便有泥連火宅人

其十四

殘杯移傍水邊亭
暑氣薰人忽自醒
最喜樹頭風定後

半池零雨半池星

其十五

斷盡人間書畫緣
非關學道與參禪
從來到手渾無味
且仗牀頭買酒錢

其十六

牆頭紫翠兩三峯
月滿觚稜風滿松
睡起支頤無一念
偶然吹送五更鐘

其十七

有人相過說無生須斷人間利與名畢竟尚殘名利字
不如支枕聽鶯聲

其十八

一閣中安兩藏書當時有諍未同居若教勘破西來意
紫氣東行也不虛

其十九

萬事全憑酒破除空勞千里故人書參軍有頌吾能熟
僕射從尊斷不如

其二十

襍纈過從不厭頻牛腰行卷墨方新生平祇被虛名累
耐可殘年乞與人

讀王百穀吹簫賦因題畫贈星槎子然此非古洞
簫也以故稱新聲云

由來子野聽偏精譜得咸陽簫史聲把向吳山吹一曲
何人不擬鳳凰鳴

其二

輕蕉徐出玉龍精一竅能為三籟鳴任是子淵佳賦就可教明主聽新聲

贈蔡汝立乞誌銘歸

三尺孤墳五尺碑中郎題字色為絲莫愁名姓長埋沒漸有人呼蔡克兒

蔡生以一紙得誌銘而客有高生者亦以一紙來謁請從遊且有所冀戲題一絕再贈蔡

婁水含滋楓欲鮮啼鳥徧遶孝廉船從他門客劉义橫

未有昌黎諛墓錢

題半閣詩

地盡天空閣自孤浮雲一半遶簷隅不知收入青山色
小減徐家破鏡無

張牧遷淮相國與諸君會餞山園感贈四絕

袖中諫草帶霜華遷客風流莫浪嗟何必漢廷饒絳灌
古來才子傳長沙

其二

愁遣玲瓏唱別辭
欲攀楊柳尚無枝
習家池館從如舊
第少山公白接羅

其三

縹緲樓頭玉萬家
使君曾此汎流霞
莫言鴻爪須臾事
幽谷猶殘琪樹花

其四

弇山堂北四株棠
夢雨離雲欲斷腸
却道異時無剪伐
飛花曾藉使君觴

走筆贈張將軍赴嶺外

母煩薏苡後車傳自有清風掃瘴烟
壓載他年借廉石盟心今日試貪泉

即事

上元燈火不須奢自有幽情領物華
踏徧東城清夜月安家園裏探梅花

長興哭子與歸途即事有感

屈指流年醉裏論清溪如舊淚痕新
也知不乏追隨客

誰是當時共濟人

其二

龍灣北岸骨堪栖
漠漠愁雲片片低
一種印山寒食地

白公墳畔酒成泥

新墓在龍灣之北

其三

當年六子五沈淪
一作人間舌底人
暗數古來文苑傳

誰能白髮畫麒麟

其四

碧練東來是雪川銀魚紫蠚不論錢從他風景長如畫
割卻浮家一段緣

其五

太初收骨道場山與隔新墳定幾灣六十年來無麥飯
可能相對憶人間

其六

玉龍橋下水縱橫酒眼摩娑醉語輕不道便成生死別
至今猶自恨潮聲

余所品顧家三白酒以甘敗而近得其法者皆勝
之因補三絕句而其一以貽胡家

品酒新詩亦浪傳顧家三白大非前如何奪署青帘字
把向胡生店裏懸

沙頭呂氏酒

掃地人間色味銓自將真趣媚丹田從教揚子中冷品
不及沙頭第一泉

五弟婦之兄曰章郎酒亦清美

壓得檀槽瑟瑟珠瀉時猶有看成無誰能閒步桃花澗
不向章郎乞一壺

清明日偶題

穠李夭桃各闕新傷心眼底上墳人生憎介子成寒食
破損風光一日春

其二

典却寒襦挂紙錢又聞呼役向楊川三家兩舍無薪米
錯認江南也禁烟

過瞻美弟飲題

傷水誅茅三五椽
網魚沽酒杏花前
欲知何物堪難弟
夜半酣歌不肯眠

過從子學賢飲

小阮才餘犢鼻褌
海棠花底奏清尊
春光如此休教負
明日催租任打門

鄉居晏起

小樓烟雨乍霏霏
支枕消教酒力微
除却西鄰呼酒外

判無剥啄到荆扉

走筆再送馮使君之楚

三吳重地古來聞
全楚雄藩更不羣
江岸送迎饒竹馬
何人不頌大馮君

其二

捲霧凌風青雀開
分明一坐玉山來
懸知傲殺南樓月
重見千秋庾亮才

贈張老

莫欺貧憊少生涯半畝沙田百種花
笑殺東籬黃菊後春光全不到陶家

調姚山人匡叔

羽扇藤衫竹籜冠自言親受九還丹
無端却愛人間好不怕山房丹竈寒

鮑先以書自通於屠青浦有國士之遇賦此贈之
予生書記似鄒陽片紙能專上客牀不信比來知已事
試聞猶有令君香

朱定國解館歸明州贈之得三絕

風物清佳浣客愁不知何事憶明州
輕舸泛盡東湖色應向婁江問舊遊

其二

兩兒頭角漸嶙峋三載東風絳帳春
白虎倘逢明主問可能忘得授經人

其三

惜別飛觴各鬪乾吳江楓落未成寒
惟憐十月山陰道

不共王家子敬看

題摘阮圖

絳紗微露玉尖纖
搗得新聲字阿咸
門外平康佳姊妹
即今偷譜不須嫌

贈照幻禪師一絕句

伏牛山下結精廬
煉盡羣魔剩一如
誰信近來能所盡
貫休詩句夢英書

金澤寺僧為余生日誦經報以一絕

除却生辰薦親外
酒船何處不沈冥
即今四大留何事
勞得山僧為捧經

題溪山深隱畫

古木寒流一兩家
柴門晝掩待歸鴉
何如只向人間住
與客攜壺踏落花

莊臨甫力田種竹有長者風
今六十矣其婿陳生懋謙中表姪也索詩壽之得一絕句

庭前種竹一千竿
屋後收禾三百廬
欲向而家漆園祖

與君重注大椿年

寄題何鴻臚仁仲甘露園

名從鐵甕城邊得人向金莖夢後歸
豈蕊梢頭渾欲醉

芙蓉葉上未應晞

俱咏甘露也

其二

海內爭傳杜甫詩何將軍第有園池
金魚銀甲從他好

第五名高心自知

君伯兄為閫帥故也

其三

一點晨光霜欲開露華初潤蕊珠臺
牆頭蛺蝶衝眉過
却道何郎傅粉來

其四

千株桃李怨春華九畹芳蘭也自嗟
水部向來心性別
只拈霜管賦梅花

贈王山人良材二絕

返照輕烟暈碧紗
翠禽翻罷玉橫斜
絕勝黃鶴樓中笛
落盡還開六月花

其二

爾貌孤山雪裏春能拋玉骨染緇塵懸知不作毛生手
却悞江妃自寫真

聞仲慧治制科業於尊生齋嘲之

新水高槐咽暮蟬尊生齋裏好談玄如何半夜篝燈讀
只是長楊校獵篇

曉上人自江右來謁敬美贈之詩云南海楊枝白
社蓮老僧無住總隨緣不知逢着文章伯可有

衣裳與大顛又行腳山僧不住山正逢居士掩
玄關却嫌留偈多重障大海長空自往還蓋謂
余方杜門不易見倚韻立贈二絕

有社何須種白蓮澆花插柳但隨緣從他佛骨原無表
那許殘花乞大顛

其二

參盡叢林踏盡山未容輕叩淨名關霜寒路滑知應否
收取三條坐具還

曉上人自云能草書轉法華千徧謁補陀落迦者
再矣告余且復往走筆反前韻止之

鯨波千疊海門還勸爾清秋且閉關但使六塵緣境淨
眼前長是補陀山

其二

草書時作素師顛一鉢何如但信緣千徧法華從自轉
還能舌本吐青蓮

家弟轉官後寄一詩扇錢叔寶有與君何日共閒

身語叔寶日作畫不休而余苦文債刺促因戲
題其後

王叟時時徵白戰錢翁日日賣青山多生未斷貪名障
博得閒身亦不閒

酬顧不疑

秋色衡門好晏眠忽聞流水兩三絃似窺吳下機雲意
有句還酬顧彥先

詹東圖進士以所刻石書見示為成二絕贈之

題罷江東幼婦碑公車二月到京師十三經就如登石
除却中郎更有誰

其二

不是君家簷舍人紫微房後寫絲綸男兒自有如椽筆
一掃燕然萬古新

答葉茂長解嘲

翟尉歸來客尚新柴門剝啄反嫌頻不如箕踞松風下
次第殘編對古人

其二

南牀白簡任他驕贏得餘年不早朝
莫道山人無約束雅聞彈事到甘蕉

送李時養游金陵

李生買棹長干游楸局奚囊在兩頭
欲覓羊郎劇基地不知何處是金溝

仲春二十日後梅花始盛偶成四絕

二月行盡初日晴千枝萬枝玉縱橫
常年花謝今年發

始信春遲却有情

其二

色觀空來定幾旬東園初吐屐痕新
莫嫌春勒梅花晚也勝無梅負此春

其三

西園幾樹玉橫斜雨打風吹一任他
縱使春光耗磨盡不甘三月伴桃花

其四

瘦骨峻嶒老不羣
怯他春雪愛春雲
自從參得羅浮夢
消息依稀見幾分

趙仁甫孝廉來乞其父墓文留山園少時賦此志別

幾樹孤山雨後香
薄寒憔悴縞衣裳
未論詩句清堪比
情性都來似趙郎

君詩清絕而
貌都雅故云

其二

弇園春晝但高眠
篋底都無諛墓錢
揮草為君生別淚

一江烟雨孝廉船

清明日偶成

小塚輕風舞紙錢
斜陽漠漠草芊芊
非關榆柳無新火
總為人家不禁烟

其二

歲歲年年世事非
朝朝暮暮故人稀
唯因白骨無窮盡
新鬼猶堪舊鬼饑

其三

楊柳梢頭颺酒旗軟輿憑着暖風吹未論天地藏身處
不起兒孫異日悲

其四

葉縣天貽白玉棺滕公石槨在長安爭如謚母祠前樹
不受人間淚眼彈

山僮言游客放歌折花者戲答之

有例何曾問主君六么三雅任斜曛主人總在茅簷底
唱遍龜茲也不聞

其二

携酒看花不碍頻
唯求酒後護殘春
不辭樹樹憑攀折
孤却明朝花下人

衡陽曾生萬里問
奇實無奇可問也
於其歸口占
贈之

落魄書生縱酒徒
久拋符印著潛夫
而今對汝機關別
但語胸中一字無

其二

悟得從前字字非臨岐無淚可沾衣
碧天雲盡都如洗
不碍衡陽春雁飛

七夕病中

病骨蕭然一葉秋
踈簾不捲絳河幽
茶瓜酒果從無分
不起人天兩地愁

其二

鄰家乞巧候天孫
月轉參橫不掩門
拙癖病來逾自愛
卧陪孤影度黃昏

其三

共君閒傍小溪行
愛弟東莊看犢耕
許與曼殊能許未
雖游族姓不求名

其四

沈郎徵事近何如
旗鼓蕭翁尚有餘
嗒爾相看無一句
可能消盡腹中書

和孫中丞登馬鞍山韻

千山如笏拱朱樓
平楚將雲勢欲浮
見說興公新賦就

坐令王粲亦銷憂

其二

獨立縹緲之飛樓
片語能令紫氣浮
却是岳陽題壁後
至今天下誦先憂

贈劉少府四膺臺獎

四見旌書下郡墀
道傍何限口碑
莫言清白無人賞
今日真成有四知

其二

贊公庭館真如洗吟岸烏紗據槁梧劉寵雖廉爭得似
橐中猶長一青蚨

其三

尚書兩世大名垂喬木干雲陰後枝處處遺碑應好在
知君不是狄公兒

黃仲高先輩枉訪有贈

蘭芬秘茀謁衿裾一片冲懷玉不如事事擬君家叔度
祇輸年少赴公車

其二

四明才子氣如虹何事低頭王長公誤道姓名登琬琰
此身原只在墻東

題復甫墨牡丹

百種沈香亭畔枝錦媽紅醉午風遲那期號國夫人到
淡掃春山八字眉

其二

半幅生綃墨乍勻天然貌出玉精神朱欄下盡歲時鎖

却是丹青解悞人

蘓山人自張司馬歸云辱倒屣之延而所謀未盡

果戲贈一絕

博得侯門一笑新鬢霜猶自未迴春人間不遇邢和璞
誰向天門禮弄臣

題瀟湘夜雨有感

扁舟十載問瀟湘曾向天東指雁行今夜對牀春夢穩
不妨風雨過西堂

作張令書戲題後

貪聞方外有閒居
筆硯垂拋樂有餘
誰信別生方外事
為僧仍作使君書

仙師處見徐郎有贈

雙瞳剪水玉為神
飯禮神壇叩宿因
自是徐家原有記
此兒天上石麒麟

偶題

一間茅屋足沈淪
無那虛名轉趁身
記得松風陶氏閣

玉書先下掃除人

其二

十里香烟夾路岐少年爭草步虛詞不知天上原無用
只禮身中一字師

余德甫見貽籜冠侑以一絕句倚韻和答

竹萌含露供朝餐餘籜猶堪劉氏冠不道道人心死盡
雨來猶作化龍看



弇州續稿卷二十二